



Sabtu, 30 Maret 2024

Ogen: Matius 27:62-66



"Kenca Telu Wari I Pekeke Me Aku"



Selaku manusia si ngeluh i babo doni enda lit piga-piga hal si pasti terjadi bas kegeluhenta, salah sadana e me kap "kematen". Kerina manusia si nggeluh i babo doni pasti ngalaken kematen. Janah selaku kita kalak Kristen kematen e me kap salah sada kemenangan si rehna i bas Tuhan Dibata nari, sabap kenca kita mate secara doni lit kegeluhen si mbaru si aloken i bas Tuhan Dibatanta nari.

I bas paksa tenengta wari si sendah ngerana kerna kematen ras kekeken Tuhanta Jesus. Ija lit tertulis bas Pustaka Si Badia **"kenca telu wari ipekeke me Aku"**, tentuna kata enda kata si itujuken nandangi Tuhan Dibatanta. Tentu selaku kita manusia biasa, kalak si enggo mate tapi mulihi ka ia keke, e me kap salah sada peristiwa si luar biasa. Banci ka erbahan kita sengget dengen termamang-mamang, janah banci labo kita tek kerna peristiwa si bagenda rupa. Seri bagi si tertulis i bas bahan renungenta enda ndai, i ja tupung piga-piga wari kenca persikapen wari sabat reh me imam-imam ngadap man Pilatus, janah imam-imam e mindo man Pilatus gelah ibahan penjaga kuburen Tuhan Jesus; sabap la tek imam-imam e nandangi kata enda ndai, janah tupung si e Tuhan Dibatanta ikataken kalak, engkap sekalak penipu.

Seri bagi pemahamenta manusia, sabap adi menurut pemeteha, kalak si enggo mate lanai mungkin keke i bas si matena nari, tapi arah bahan paksa tenengta si sendah ngatakensa, maka Tuhanta Jesus Kristus keke i bas si mate nari. Eme kap pas i bas wari si peteluken kenca IA mate, janah enda pristiwa si erbahansa enterem kalak sengget, termasuk pe ajar-ajar.

Peristiwa kekeken Tuhan Jesus ngatakensa dengen encidahken kerna Kuasa ras kinimbisaan Tuhan. Kenca telu wari ipekeke me IA i bas si mate nari, kalimat enda nuduhkan maka Tuhan si sembah kita e me Tuhan si erdolat dengen erkuasa nandangi kematen si ikebiarken manusia. Tuhan nggo ncidahkan kuasaNa, marilah kita tetap enggeluh i bas kiniteken.